



KEPINGAN bumbung yang tercabut sebelum terhempas di atas jalan akibat diterbangkan ribut dalam kejadian di Apartmen Putra Ria, Bangsar kelmarin.

Penduduk kecoh lihat atap melayang akibat ribut

Cemas lihat kepingan bumbung tercabut

Oleh AZMI NORDIN

KUALA LUMPUR – Seorang suri rumah melalui detik cemas apabila menyaksikan bumbung kediamannya diterbangkan angin kencang dalam kejadian di Blok 94, Apartmen Putra Ria, Bangsar di sini kelmarin.

M. Santha Kumari, 41, berkata, ketika kejadian, dia bersama adiknya berada dalam rumahnya di tingkat 20 sebelum hujan turun dengan lebat diikuti angin kencang.

"Dalam pukul 6.30 hujan lebat angin kencang, saya nampak depan mata bumbung (yang berada di tingkat 22) terbang jatuh ke bawah, kami sekeluarga terus ketakutan sebab angin tiup kencang dekat blok atas.

"Ini pertama kali jadi. Nasib baik bumbung itu menimpa kenderaan sahaja dan tidak melibatkan kehilangan nyawa," katanya ketika ditemui di lokasi kejadian.

Tinjauan mendapati, enam buah unit rumah terjejas akibat bumbung tercabut ekoran ditiup angin kencang selain beberapa kenderaan mengalami kerosakan dihempas zink.

Sementara itu, Rodziah Noordin, 51, berkata, sebagai penduduk yang menetap hampir 20 tahun di sana, beliau masih terkejut dengan kejadian tersebut.

Jelasnya, keadaan seakan huru-hara seketika selepas bumbung tersebut terkena beberapa kenderaan yang berada di kawasan parkir di bawah blok itu.

"Riuh jadinya, saya nampak



ANGGOTA bomba melihat kerosakan yang dialami beberapa buah lori selepas ditimpa pokok tumbang di sekitar Kuala Lumpur kelmarin.

macam asap berterabur dekat atas, bumbung itu jatuh sebanyak dua kali, masa kejadian hujan sangat lebat, orang ramai semua turun nak alihkan kenderaan kerana risau apa pula yang akan jatuh.

"Kebetulan masa kejadian tiada siapa dekat bawah. Saya harap ada tindakan seperti bantuan diberikan kepada mereka terjejas, macam yang berada di tingkat atas," katanya.

Terdahulu, sebanyak empat lokasi dilaporkan mengalami insiden pokok tumbang di sekitar

ibu negara berikutan ribut dan hujan lebat.

Pusat Gerakan Operasi Kuala Lumpur dalam kenyataan berkata, maklumat kesemua insiden itu diterima bermula pukul 6.20 petang hingga 7 malam.

Empat buah lori seberat tiga tan di Jalan Klang Lama, berhampiran sebuah stesen minyak rosak akibat ditimpa pokok tumbang.

Pokok tumbang turut dilaporkan berlaku di kawasan Universiti Malaya, sekitar Taman Tun Dr. Ismail, Jalan Long Yew Koh dan beberapa lokasi di Petaling Jaya.